

EDITORIAL

Hilarum nga krisis ngan mapintas nga mga pakigbisog hini nga naglabay nga tuig

Dugang nga nagpintas hini nga naglabay nga tuig 2025 an krisis ha ekonomiya ngan pulitika han naghahadi nga sistema, mas naggrabe an pangiginlabot militar han imperyalismo nga US ngan naggrabe an pankatilingban nga kamuntangan han mayoriya han katawhan. Kadungan hini, nagpintas an mga pakigbisog kontra ha korapsyon ngan pasismo han rehi-men US-Marcos.

Nagin butaray an sumpakiay han mga naghahadi nga klase, partikular an banggaay han magkaribal nga barkadahan nga Marcos ngan Duterte. Iginsalawad ha House of Representatives hadton Pebrero an kaso nga *impeachment* kontra kan Sara Duterte, kundi napiliw an kaso han ulangan mismo ni Ferdinand Marcos Jr an pagbista ha Senado. Hadton Marso, nakigbuligay hi Marcos ha Interpol ha pag-aresto ngan pagpriso ha The Netherlands ha hadto anay presidente nga hi Rodrigo Duterte subay ha mandamyento han International Criminal Court. Didto hiya bibistahan ha mga krimen ha katawhan tungod ha tinagdamo nga pagpatay ha “war on drugs.”

Ginhimo hadton Mayo an eleksyon ha senado, kongreso ngan lokal nga gubyerno. Butaray an panlibo ngan manipulasyon an resulta. Gin-espiho hini an sumpakiay ngan akomodasyon han magkalain-lain nga barkadahan han naghahadi nga klase, ngan pangiginlabot han im-

peryalismo nga US. Samtang nagpapabilin nga bug-os an suporta han US kan Marcos, iginpupwesto na gi-hap hini an iya mga reserba nga kabayo para ha pagdalagan ha 2028.

Waray katupong an pangiginlabot militar han US ha bug-os nga tuig. Ha pakikigkunsabuhay ha rehi-men Marcos ngan gamit an Armed

Forces of the Philippines (AFP), ginabrihan an bag-o nga mga base ngan panmilitar nga pasilidad. Nag-istak an US han kadugangan nga mga higamit pan-gerra ha Pilipinas. Waray hunong nga iginlansar an mapanulsol nga mga panmilitar nga ehersisyo ha sakob ngan palibot han South China Sea, ha kahibangan han mga parupangisda nga Pilipino.

Dugang nga nagpintas an banggaay han mga naghahadi nga klase kahuman mabuksas an dagko nga kaso han korapsyon kasumpay han maanomaliya nga mga *flood control project* ngan kontrata ha mga proyekto nga pan-impras-traktura. Binuto an kangalas han katawhan ha malabukid nga kwarta nga iginbubursa ni Marcos ngan han mga korap nga upisyal han gubyerno.

Nagrabunos ha bug-os nga nasud an hiluag nga kagiusan protesta kontra ha korapsyon ngan burukrata kapitalismo. Sakob han duha kabulan tikang Septyembre, dirudiretso an mga *walkout* ngan rali han mga estudyante ha magkalain-lain nga kampus. Nabug-os an higlapad nga alyansa han mga pwersa nga kontra-korapsyon ha magkalain-lain nga sektor ngan lugar, bisan pa mayda pira nga pwersa nga tinuyo nga ighirayo an kangalas han katawhan kan Marcos.

Ha butnga han pag-aatentar nga tahuban an papel



han Malacañang ha mga anomaliya pinaagi han pasalida nga “imbestigasyon,” iginbuksas han mga dabi ha korapsyon nga hi Marcos mismo an utok ngan kinarawat han pinakadako nga kikkab ha gatus-gatus kabilyon piso nga mga proyekto nga pan-imprastraktura. Waray pag-ih, nag-aningal an guliat para ha pagpapare-sayn o pagpapatalsik kan Marcos ngan Duterte.

An kagiusan kontra korapsyon naglarab ha butnga han padayon nga paghilarum han krisis ha ekonomiya, pagluros han kamutangan han hiluag nga masa han katawhan, ngan wala-tuo nga mga programa ngan pitad han rehimen Marcos nga pakuri ha nasud.

Hiluag an pagdumiri han katawhan atubangan han himubo nga suhol han mga trabahador, kawaray hin trabaho, haros sinemana nga paghi-taas han presyo han lana, hitaas nga sukot ha palpak nga serbisyo ha tu-big, kuryente ngan transportasyon, *jeepney phaseout*, pribatisasyon han mga merkado, mapanwakay ha kali-bungan ngan pakabuhian nga rekla-masyon ha dagat, panlulupot ha tu-na, pagpapaiwas ha mga parag-uma ngan iba pa nga pakuri. Buwa an gin-sesering nga kamurayawan ha but-nga han grabe nga panmuypoy ngan pagpapakuri ha katawhan.

Hiluag an panawagan para ha ₱1,200 nga inadlaw nga minimum nga suhol. Nagin landaw an pira nga welga han mga trabahador ngan paggios han magkalain-lain nga sek-tor ha magkalain-lain nga lugar agud ipakigbisog an ira kaupayan. Tikahi-luag ngan tikadamo an nagtitikapin-tas nga pag-ato ha pasista nga pan-darahug han rehimen Marcos. Damo an napukaw ha pagpapalandaw han mga progresibo nga partido ha na-syunal-demokratiko nga program ha pagpartisipar ha eleksyon. An pagpu-pursige ha pag-oorganisa ngan pag-papagios ha masa piho nga matitirok ngan mabuylo ha mga tiarabot nga panahon.

Atubangan han hilarum nga krisis ngan magpintas nga pakigbisog, ngan bunga han kagiusan pagtutul-id, di-rudiretso nga nakakapagpakusog an Partido ngan mga rebolusyunaryo nga pwersa. Dirudiretso nga igin-iisa an balitang han teorya ngan praktika pi-naagi han kagiusan pag-aram. Ginpa-pasamwak han Partido an pag-aram ha burukrata kapitalismo komo giya ha pagsantop han katawhan ha linan-daw nga isyu han korapsyon.

Ginpapakusog an mga sikreto nga rebolusyunaryo nga organisasyon masa ha kasyudaran han mga traba-hador, parag-uma, kabatan-unan, magturutdo, artista, siyentista, mga

doktor, nars ngan trabahador pankalibugan, tawo ha singbahan, mga migrante nga Pilipino, ngan iba pa nga mga sektor. Samtang nagpopro-paganda para ha demokratiko nga rebolusyon han katawhan, tikadamo an nagdedesisyon nga magpartisipar ha armado nga pakig-away ngan re-bolusyunaryo nga kagiusan parag-u-ma ha kabaryuhan.

Ha kabaryuhan, dirudiretso nga naabante an mga pakigbisog han pa-rag-uma ha pagdependa han ira tuna ngan pakabuhian kontra ha mga pa-rupanlupot, kontra ha pakuri nga mga palisiya han rehimen Marcos ngan pasista nga pandarahug han mga armado nga alipures hini. Lan-daw an mga barikada ngan iba nga porma han paggios ha pira nga lugar. Ginpapakusog an mga sanga ngan komite han Partido, ginbubug-os an mga rebolusyunaryo nga panmasa nga asosasyon han mga parag-uma, kabatan-unan ngan kababayin-an, an ira mga yunit milisya ngan yunit ha pagdependa-ha-kalugaringon, sam-tang nagpupursige an mga yunit han Bagong Hukbong Bayan ha buruhaton masa ngan ginerilya nga pakiggerra.

Ha pamumuno ngan kabakyang han Partido, dirudiretso an BHB ha pagpapahiluag ngan pagpapahilarum han base panmasa han parag-uma. Angkon an hiluag hini nga suporta, kadam-an han mga yunit han BHB nakapagpreserbar han kusog ha pag-atubang ha waray hunong nga mga pankombat nga operasyon han AFP. Tikadamo an mga kadaugan ha aktibo nga dependa, taktikal nga opensiba ngan pagsirot ha mga lunod-patay nga traydor ngan pasista. Dirudiretso an mga pagrerekrut ngan pagpapa-hiara han mga bag-o nga Pula nga mangaraway ngan kumander.

Ha atubangan han natikahilarum nga krisis han naghahadi nga siste-ma, ngan ha pundasyon han kagiu-san pagtutul-id, nakatan-aw an Par-tido ha mas pagpapakusog ngan pagpasulong han demokratiko nga rebolusyon han katawhan ha tiara-bot nga mga tuig. Determinado an Partido nga pamunuan an hiluag nga masa ha pagpasulong han pan-maihaan nga gerra han katawhan ngan pagkab-ot han mga kadaugan ha bug-os nga nasud.

 Bolyum LVI Ihap 24 Disyembre 21, 2025 Igin-gagawas an Ang Bayan ha lenggwahe nga Pilipino, Bisaya, Iloko, Hiligaynon, Winaray ngan Ingles. Nakarawat an Ang Bayan han mga kontribusyon ha porma han mga artikulo ngan balita. Gin-aaghat liwat an mga mambarasa nga magpaabot hin mga suson ngan rekomendasyon ha ikauuswag han aton mantalaan.	Gin-uunod Editorial: Hilarum nga krisis ngan mapintas nga mga pakigbisog hini nga naglabay nga tuig 1 Mga aksyon han BHB ha Negros ngan Samar 3 Ukoy-bubto ha Pasko ngan Bag-o nga Tuig han PKP 3 Dirudiretso nga konsolidasyon ha Negros 4 Pakigbisog han trabahador 4 Ayat han CNL para ha hustisya 5 Kunsabuhay nga kumprador burgesya, burukrata 6 Ha dagmit nga pulong 7 Pakigbisog para ha tawhanon nga katungod 8 3 katuig nga pagkamatay ni Ka Joma, ginhandum 9 MSP-NCR, naglansar hin asembleya 9 Mga parag-uma ngan minoriya, ginpapalayas 9 Adlaw han mga migrante nga trabahador 10 Brutalidad han militar ngan pulis 10 Aregluhay han pondo nga “pork” ha badyet 2026 10 Destroso, kasamukan han gerra nga imperyalista 11 Diri mapeperdi an rebolusyon hIndia 12
An Ang Bayan igin-gagawas duha kabeses kada bulan han Komite Sentral han Partido Komunista ng Pilipinas	
 ang.bayan@cpp.ph	

Mga aksyon han BHB ha Negros ngan Samar

Lima nga armado nga aksyon an iginlansar han mga yunit han Bagong Hukbong Bayan (BHB) ha isla han Negros ngan Samar ha naglabay nga mga semana. Kalakip hini an pagtarget ha mga aset paniktik ngan nag-ooperasyon nga mga pulis.

Ha Negros Occidental, napatay hi Police Senior Master Sergeant Rommel Aguilar han makigpusilay an mga pulis ha usa nga tim han BHB-Northern Negros (Roselyn Jean Pelle Command). Nakumpiska ha iya an usa nga 9mm pistola ngan mga bala. Nakahitapo han BHB an grupo han mga pulis ha Purok 5, Barangay La-gaan ha Calatrava hadton Disyembre 7. Paatras hadto an mga Pula nga mangaraway tikang ha aksyon militar kontra kan Mando Ugdiman, usa nga aset paniktik han militar, ha Sityo Tagda, Barangay Dolis. Nakumpiska kan Ugdiman an usa nga .45 nga pistola, mga bala ngan iba pa nga higa-mit pan-gerra.

Hadton Disyembre 13, patay an aset paniktik nga hi Amay Jimenez ha Sityo Makilo, Barangay Camansi, Kabankalan City ha operasyon han BHB-Southwest Negros (Armado Su-

mayang Jr Command). Dabi hi Jimenez ha pagtudlok han lokasyon ngan pagplano ha pagpatay hadton Nobyembre 2022 ha bugto niya nga lider parag-uma nga hi Joseph Jimenez ngan konsultant pankamurayawan han National Democratic Front of the Philippines nga hi Ericson Acosta. Usa pa nga aset paniktik an ginsirutan ha Sipalay City hadton Disyembre 4.

Abtik nga pagdepensa

Ha Samar, duha nga sundalo han Intelligence Service of the AFP (ISAFP) ngan Military Intelligence Batallion (MIB) ha ilarum han 8th ID an napatay ha armado nga engkwentro ha BHB-Western Samar (Arnulfo Ortiz Command) ha Barangay Ba-baclayon, San Jose de Buan. Nahitabo an agway ala-1:32 han kaagahon hadton Disyembre 3. Sigon ha report han BHB, duha nga mangaraway hini

an aada ha komunidad agud konsultahon an masa nga ginlalasurbo han militarisasyon han mga sundalo. Diri mamenos ha 20 nga tropa han militar an tulo kaadlaw na nga nag-ooperasyon ha nasering nga komunidad hiton nga adlaw.

Ginpalibutan han mga operatiba nga paniktik han militar an balay nga ira gin-ukyan ngan pirit hira nga ginpapasurender. Atubangan hini, ginseguro han mga Pula nga mangaraway an katalwasan han mga sibilyan, ngan talwas nga ginpagawas han balay an bug-os nga pamilya. Ginpabuthan han usa nga Pula nga mangaraway an mga sundalo nga ira iginkatigda. Ha atubangan mismo han mga kaaway dinapa an Pula nga mangaraway samtang nagpapabuto han iya dara nga pistola. Duha nga pasista nga tropa an napatay ha atubangay nga agway. Agud makahirayo, linukso an duha nga Pula nga mangaraway ti-pagawas han balay samtang ginpabuthan han kaaway. Nasamaran an usa ha mga mangaraway. **AB**

Ukoy-bubto ha Pasko ngan Bag-o nga Tuig, igindeklara han PKP

Nagdeklara han upat kaadlaw nga ukoy-bubto an Partido Komunista ng Pilipinas (PKP) komo pakig-usa ha mga tradisyunal nga pagselebrar han masa nga Pilipino. Ginmanduan han Komite Sentral an Bagong Hukbong Bayan (BHB) nga ipatuman ini tikang 00:00 han aga han Disyembre 25 tubtub 23:59 han gab-i han Disyembre 26 ngan tikang 00:00 han aga han Disyembre 31 tubtub 23:59 han gab-i han Enero 1, 2026.

Sigon ha pamunuan han Partido, paghatag-wada an ukoy-bubto ha mga simple nga pagselebrar han mga Pilipino atubangan han grabe nga pankatilingban ngan pan-ekonomiya nga kamutangan ha ilarum han rehimen Marcos. Higayon liwat ini han mga rebolusyunaryo nga kagiusan, kaupod an katawhan, para igselebrar an ika-57 nga anibersaryo han Partido ha Disyembre 26.

Ha pagpapatuman han ukoy-bubto, ginmanduan han Komite Sentral an mga yunit han BHB nga mag-aktibo nga depensa labina ha atubangan han panlalasurbo han

waray hunong nga mga pankombat nga operasyon han Armed Forces of the Philippines (AFP). Kinahanglan kuno mahugot nga makigbuligay an mga yunit han BHB ha masa para mahipatuman ini. "Kinahanglan liwat hira pirme andam nga magma-niobra o maglansar han kontra-atake ha panahon nga ginkikinahanglan han kamutangan," sigon ha Komite Sentral.

Layon nga ginkontra han AFP ngan Department of National Defense an unilateral nga ukoy-bubto han Partido ngan hukbo han katawhan. Sigon ha Partido, ini nga paha-

yag han mga tawuhan han rehimen Marcos nagpapamatuod ha uhawha-dugo nga kinaiya han iya armado nga pwersa ngan larang nga is-torbohon an mamurayaw nga pag-salin-urog han masa nga Pilipino.

"Waray iba nga karuyag igregalo hi Marcos ha katawhan ha tiarabot nga mga tradisyunal nga selebrasyon kundi bala ngan bomba ha pagmamando hini ha AFP ngan mga pulis nga maglansar han waray hunong nga mga operasyon kombatan ha kabaryuhan," sigon kan Marco Valbuena, upisyal ha impormasyon han Partido.

Samtang, ginsukna han Partido an iginpapasarang han Philippine Army ha pagtalapas han BHB ha ukuy-bubto ha agway nga nahibato ha Northern Samar hadton Disyembre 15, bisan kun diri pa ini lupgop han deklarasyon. **AB**

Kagiusan Pagtutul-id: Dirudiretso nga konsolidasyon han Partido ngan BHB ha Negros

Ha butnga han sik-on nga operasyon militar, nagpupursige an rebolusyunaryo nga kagiusan ha Negros ha pagpapasulong han kagiusan pagtutul-id. Dirudiretso ini nga nagtatalinguha nga konsolidahon an Bagong Hukbong Bayan (BHB) ngan an Partido. Naglansar ini han mga kolektibo nga mga pag-aram ngan barubalitang nga kurso han Partido ngan mga pagpapahiarang militar.

Diri pala maiha, nahilansar ha isla an intermedya nga kurso han Partido ha "staggered" o paruparte nga pamaagi. Gintambungan ini han mga kadre ngan upisyal militar. Talwas nga nahanman an bug-os nga kurso nga nag-iha han kabug-usan nga 54 kaoras. Unod han pag-aram an dugang nga mga prinsipyo nga giya ha pagpaparayhak han buruhaton masa ngan pagpapatuman han mga rebolusyunaryo nga buruhaton ha balayan han kagiusan pagtutul-id.

Madinaugon liwat an paghuhuman han mga kadre ngan upisyal han BHB ha pag-aram ngan pagpahiarang ha ginpahalipot nga kurso ha buruhaton paniktik. Tulo ngan tunga hin adlaw, lakip na an praktikum, an kaihaon han pagpahiarang. An resulta han praktikum napagdesisyonan han kumand nga himuon nga upisyal na mga plano ha mga iglalansar nga taktikal nga opensiba han BHB.

"Dugang nga kahibaruan an teoretikal nga pag-aram ngan ini nga pagpapahiarang ha madinaugon nga buruhaton militar labina an paglansar han taktikal nga opensiba," sigon kan Ka Marco, lider han platoon.

"Kinahanglan matagan hustisya an mga biktima ngan mga kasama ngan masa tikang ha grabe nga pasismo han kaaway... kinahanglan makagkumpiska han bala ngan armas tikang ha berdugo ngan pasista nga AFP, PNP ngan paramilitar ngan ig-armas ha mga bag-o nga rekrut nga Pula nga mangaraway" sering niya.

"Hinog kaupay yana an pampulitika nga kamutangan. Kinahanglan batunon han Partido an iya papel ha pamumuno ngan himuon han Hukbo an sentral nga responsibilidad hini pinaagi han madinaugon nga taktikal nga opensiba kadungan han mga grabe nga kangalas han katawhan Pilipino hiunong ha pangungurakot han estado ha kwarta han katawhan," sigon kan Ka Myra, pampulitika nga instruktur.

"Kinahanglan makusog nga pabagtingon an lingganay han rebolusyunaryo nga kagiusan ha hiluagan nga opensiba ngan mag-aningal an bubto

han mga armas han Bagong Hukbong Bayan ha kabaryuhan kadungan han hiluagan nga protesta han masa ha mga kakalsadahan ha kasuyudaran," sering niya.



CBA han Wyeth-Nestle ngan unyon. Pormal na nga ginserra han Wyeth Philippines Progressive Workers Union an CBA hini ha Wyeth-Nestle Philippines hadton Disyembre 9. Madinaugon nga nahiinsister han unyon an dugang nga suhol nga ₱6,000 ha masunod nga tulo katug. Nakab-ot liwat han unyon an ₱30,000 nga *signing bonus* ngan mga benepisyo nga iginpakigbisog nira ha duruyog nga paggios.

Protesta han mga trabahador han Gardenia at Philfoods. Gumios an mga trabahador ngan unyon han Gardenia Bakeries Phils Inc ngan Philfoods Fresh Baked Products Inc ha pabrika ngan ha gawas han Laguna International Industrial Park (LIIP) ha Biñan, Laguna hadton Disyembre 19. Nanawagan hira han dugang nga suhol, benepisyo, ngan pagpaundang ha pangatake ha mga myembro han unyon.

Mga marino nga igindeport han US, ginsukot an DFA ngan mga *manning agency*. Kahuman mahiagum han arbitraryo nga deportasyon han US, igin-insister han mga marino nga Pilipino an ira katungod, ngan ginsukot an DFA ngan mga *manning agency*. Ha dayalogo hadton Disyembre 12, nagsaad an opisyal han DFA nga padadagmiton an pagproseso han bag-o nga pasaporte han apektado nga mga marino, bulig para mag-apelar ha pagkansela han visa ngan pagtanggap han kabaraydan kasumpay hini.

Pagrespeto ha mga katungod ha pagtrabaho, igin-insister ha Wipro Cebu. Naglansar han *silent protest* an mga empleyado han Wipro Philippines ha Cebu kadungan han pakikigdayalogo han mga tinaglawas nira ha kompaniya ngan DOLE hadton Disyembre 1. Iginreklamo han mga empleyado an luun-luon nga mga pagtalapas han kompaniya ha ira katungod ha pagtrabaho. Prinsipal nga reklamo nira an diri makatadungan nga plano han Wipro Cebu nga igpailarum an 400 nga empleyado ha "floating status" tikang hadton Disyembre 15.

Mga Pilipino nga trabahador ha Taiwan, binoto para magwelga. Binoto hadton Disyembre 1 agud magwelga an kababayin-an nga trabahador nga Pilipino ha Taidoc Technology Co. Ltd kontra ha pagtalapas han kompaniya ha mga balaud ha pagtrabaho. Kalakip ha mga pagtalapas an pwersahay nga pagpapalimpyo ha pabrika, mahugot nga pali-siya ha dormitoryo, ngan diri makatadungan nga mga kabaraydan. Ini an pinakasyahan nga welga han unyon.

Pagpanday han pankalitingban nga konsensya ngan pagkaurusa para ha hustisya ngan kamatuoran

Linandaw hini nga mga nakalabay nga bulan an hiluagan nga partisipasyon ngan pagpartisipar han mga tawo ha singbahan, lider-relihiyoso ngan layko ha mga demonstrasyon kontra ha grabe nga korapsyon han rehimen Marcos. Bisan kun nagpapabilin nga konserbatibo an Singbahan, an tingog ngan tindog hini an usa ha diri madidiwara nga nakakaaghat ha yukut-yukot nga magpartisipar ha kagiusan han katawhan kontra-korapsyon.

Ha butnga hini an rebolusyunaryo nga pakigbisog han mga membro han Christians for National Liberation (CNL) nga rubas han pakigbisog han katawhan han mga Kristyano. Kalakip ini ha mga iginpasaro nira Ka Lila ngan Ka Mingol, mga bag-o nga naeleher nga upisyal han CNL, ha interbyu han Ang Bayan.

Dako an impluwensya han Singbahan ngan iba pa nga relihiyoso nga grupo ha usa nga nasud sugad han Pilipinas nga mayoriya Katoliko, pagpasaro ni Ka Mingol.

"Iginkokonsidera hira nga tagapagyakan han hustisya ngan kamatuoran," sering niya. Maka-eenganyar ha mga pamilya ngan komunidad an pagpartisipar han singbahan ngan relihiyoso ha mga gios protesta tungod kay suklanan hira han *moral legitimacy* o pagin tandong, ha mata han kadam-an.

Sigon kan Ka Lila, igintututdo ha mga tawo ha singbahan ngan paragtuo an paghigugma para ha igkasi, an pagin tangkod ha pagbulig ha kada tagsa, agud gumios para ha kamatuoran ngan katangkuran labina atubangan han grabe nga kakurian ngan kalamidad. "Diri makarukarawat an sistematiko nga pangawat han rekursu nga kinahanglan igin-aalutaga ha mga pinaka-nanginanghanglan," sering niya.

Kundi hadton Nobyembre 30, linandaw an magkalain-lain nga tindog han Singbahan ha panawagan han katawhan. Nakit-an ini ha nagin gios han Iglesia ni Cristo ngan mga lider han Catholic Bishop's Conference of the Philippines. Hito nga mga higayon, nanawagan an CNL nga waray-kompromiso nga manin-

dugan ngan gumios subay ha hustisya, kamatuoran, ngan katangkuran, ngan umalinggawas ha bangaay han mga naghahadi nga klase ngan mga pamilya nga nagpupulos ha bukrata kapitalismo.

"An isyu han korapsyon ha *flood-control projects* usa nga guti nga parte la ha hiluagan ngan sistematiko nga korapsyon han reaksyunaryo nga gubyrno," sigon kan Ka Lila. Diri la ini hiunong ha tipa-tipa han pipira kundi hiunong ha bukrata kapitalismo o paniniyupi nga nahitatabo ha pagpapadalagan ha gubyrno komo negosyo, an paghakin han karikuhan han mga aada ha poder."

"Ginpapara han CNL an naratibo nga ha duha nga nagbabanggaay nga kampo la kinahanglan matunga an paggapil, tungod kay ngaduha kinahanglan mapagbaton kaupod an iba pa nga mga nadadabi hira Marcos Jr ngan Sara Duterte," sering naman ni Ka Mingol.

Bisan kun nag-iiriba an ginsesering han mga lider han singbahan hiunong ha korapsyon, sigon kan Ka Lila, klarado ha CNL an hiluagan nga kangalas dinhi han masa nga relihiyoso.

"Ayat ha mga lider han singbahan nga magin susbaranan han pa-

gin mapainubsanon ngan dayalogo," pagpapadayon ni Ka Mingol. Nananawagan liwat hiya ha mga uruubos nga lider—mga obispo, padi, pastor, ministro, ngan mga lokal nga lider—nga diri magin tagasunod la han upisyal nga linya, labina kun talapas ini ha mga nahibaruan nira hiunong ha hustisya. "Tagdependa hira han kadam-an, diri tagdependa han poder o kamingawan atubangan han karat-an. Kinahanglan nira moldehon an konsensya han kaapihan agud magpartisipar hin may panindugan diri la komo membro han bloke kundi komo mga responsable nga indibidwal han katilingban."

Kapareho ha naglabay, dako kaupay an papel han Singbahan ha pag-oorganisa ngan pagpupukaw ha katawhan para ha hustisya ngan pankatilingban nga pagbabag-o, sigon kan Ka Mingol. Importante nga waray hunong nga pakusgon an ranggo para ha demokratiko nga rebolusyon han katawhan. Sering niya, determinado an CNL nga maungbawan ngan mahidaug an mga grabe nga ayat han konserbatismo, *self-preservation* (para ha kalugaringon nga interes) ngan *Red-tagging* agud kab-uton an bag-o nga rayhak han pagpapahiluag han mga rebolusyunaryo ha mga tawo nga relihiyoso.

Iginpapasantop han CNL nga agud mahisalikway an bukrata kapitalismo, kinahanglan han rebolusyunaryo nga paggios. Usa ini ha nagpupukaw ngan nag-uurusa han kaburut-on, labina ha hiluag nga ranggo han relihiyoso nga kabatan-unan. Ginkikit-an hira han rayhak ha pagpartisipar ha mga gios protesta tubtub ha armado nga pakig-away ha kabaryuhan. Iginkakampanya han CNL ha mga tawo ha singbahan an rebolusyunaryo nga programa han National Democratic Front: iginpapakita nga mayda alternatibo nga sistema han panggubyrnuhan nga nagseserbe ha demokratiko nga interes han masa. **AB**



Kunsabuhay nga kumprador burgesya ngan burukrata kapitalista ha sistemiko nga korapsyon

Hini nga naglabay nga mga bulan, nabuksas an sistemiko nga korapsyon ngan butaray nga pangawat ha pondo han katawhan han mga aada ha poder. Tikang ha maanomaliya nga proyekto nga imprastruktura ngan pork barrel, "unprogrammed appropriation" ngan "allocables" ha nasyunal nga badyet, naging landaw an papel han burukrata kapitalismo ha nahiaaguman nga diri mailob nga pag-inantos ngan kakablasan han katawhan.

Ilarum han naeksister nga sistema, diri la gin-gagamit han mga burukrata kapitalista an ira pusisyon para maghakin han karikuhan. Naghihimo liwat hira han mga balaud ngan nagpapatuman han mga palisiya nga nagseserbe ha ginpaboran nira nga dagko nga kumprador burgesya ngan langyaw nga kapitalista. Hini nga proseso, dugang hira nakakaghakin hin karikuhan.

Ha sakob hin masobra tulo katuig han rehimen US-Marcos, nag-amyenda ngan nagpatuman ini hin diri mamenos ha 15 nga balaud para ha kahimyanan ngan benepisyo han mga kumprador burgesya ngan langyaw nga kapitalista. Kalakip dinhi an mga balaud para ha pag-iiban hin buhis han mga korporasyon, pagtugot ha mga kompaniya nga manag-iya han 100% ha mga esensyal nga industriya han nasud sugad han telekomunikasyon, erport, ngan *renewable energy*. Dugang dinhi an pagtugot ha pag-angkon ngan paggamit han mga tuna han Pilipinas hin tubtub 99 katuig. Ginpadagmit ngan ginpasayon liwat han rehimen an pagproseso ha aplikasyon han mga langyaw nga mamuruhunan ha nasud.

Kaupod hira Manny Villar, Enrique Razon ngan Ramon Ang ha mga kumprador burgesya nga ura-ura nga nagriko ilarum han rehimen US-Marcos. Ini liwat nga tulo an aada ha likod han pinakadako nga partido pulitikal ha nasud. Katin ni Razon an National Unity Party, hi Villar an Nacionalista Party ngan hi Ramon Ang an Nationalist People's Coalition.

Kontrolado nira an aada ha 42% han mga senador, 27% han mga kongresista ngan 33% han mga gobernador.

Pribatisasyon komo parte han sistemiko nga korapsyon

Pira nga surok han karikuhan han dagko nga kumprador burgesya an pribatisasyon han mga serbisyo, imprastruktura ngan pampubliko nga negosyo. Usa ha mga pamaagi para makakuha han proyekto an pinaagi han Unsolicited Proposal (UPS) han Public-Private Partnership Code of the Philippines (2023). Ilarum han balaud, mas ginpapakusog an poder han pribado nga sektor nga pilion ngan igdumara an mga proyekto nga karuyag nira kontrolon.

Ilarum han PPP, nahatag an gubyrno hin "garantiya" tikang ha pondo han katawhan agud maseguro nga madadayon an proyekto. An gubyrno liwat an masalo ingkaso malugi an proyekto.

An San Miguel Corporation (SMC) ni Ramon Ang, an usa ha grabe nga nagpulos ha PPP. Nakuha han SMC an pira ha dagko nga proyekto hini pinaagi han UPS. Kalakip dinhi an New Manila International Airport (NMIA), MRT 7, Cavite-Batangas Expressway, ngan Pangasi-

nan Link Expressway. Tungod ha konsabuhay ni Ang ngan han rehimen Marcos, masayon nga nakuha han SMC an kontrata ha pag-opereyt ngan pagdumara ha prinsipal nga erport han nasud ngan ha higante nga proyekto nga Navotas Bay Reclamation Project. Kalakip ha proyekto an pagtindog han *business district* ngan *expressway* tipakadto ha NMIA. Nakakuha liwat an kompaniya hin napulo katuig nga *tax holiday* (pag-iban o pagtanggap han buhis) para ha konstruksyon han NMIA.

Ha luyo han destroso ha kalibungan ngan pakabuhi han katawhan tungod ha mga proyekto nga imprastruktura han SMC, waray ini baratunon ha mga pagtalapas ha balaud ngan tawhanon nga katu-ngod. Samtang naghahakin hin karikuhan gamit an pondo han katawhan, natatagamtaman hini an proteksyon han mga burukrata kapitalista, nga nagpupulos liwat hini nga mga negosyo. Libyano liwat nga nagagamit han SMC an pulis, militar, lehislatura ngan mga korte agud protehiran an interes hini. Ginpapalawak hini nga konsabuhay an grabe nga korapsyon ha sistema nga burukrata kapitalismo.

Ilarum han pribatisasyon, an langyaw nga kapitalista ngan lokal nga kumprador burgesya an nagdikta kun ha anu-ano nga parte han ekonomiya an bubuhusan hin pondo, tiunan-o ngan para kanay an pag-uswag. Ha padayon nga pagduso han rehimen US-Marcos ha pagsapribado han nasasalin nga mga pampubliko nga serbisyo, korporasyon ngan imprastruktura, dugang naman nga nalulumos ha rusak han kakablasan an katawhan samtang mas nagriko ngan nagigin hakog an mga kumprador burgesya ngan burukrata kapitalista.



MGA PAGTALAPAS HA TAWHANON NGA KATUNGOD

(DISYEMBRE 1, 2024 - DISYEMBRE 1, 2025)

239,357 665
IHAP HAN BIKTIMA IHAP HAN KASO


40 312 34 306 21
PAGPATAY PAGPASUOL PAGSIKMIT TORTYUR PANMIRIT

11 373 7,645 12,187
PAKYAS PAG-ARESTO PWERSAHAY NGA PANANARHUG, PAN-GIGIPIT
NGA PAGPATAY NGAN DETENSYON PAGPA-EBAKWET, DISLOKASYON NGAN INTIMIDASYON

Ispesyal nga Report:

Kadungan han hiluagan nga korapsyon: Rehimen US-Marcos, padayon an pasista nga panmuypoy ha katawhan

<https://philippinerevolution.nu/>



Celine
Manlimbasog

an bag-o nga tagapagyakan han NDF-Eastern Visayas. An pagtuin ha iya kaparte han ginparayhak nga buruhaton ha propaganda han rehiyon. Utro liwat nga igin-gawas an Larab, rebolusyunaryo nga mantalaan ha rehiyon.

50 katuig na

an Liga ng Agham para sa Bayan ha tiarabot nga Disyembre 26.

₱24.81 KAMILYON

pondo nga igin-gawas han SSS nga pensyon hadton 2024 nga nakapangaran ha patay na nga mga membro hin. ₱13.19 kamilyon naman an gin-gastos hini para ha 143,424 nga tissue paper roll o ₱92.00/roll.

400,000

nga sibilyan an gin-ebakwet tikang ha bawnderi han Thailand ngan Cambodia tungod ha pagbuto han gerra giutan han duha nga nasud. Kaupod ha ira an 118 nga magturutdo nga Pilipino.



iginhitaas ni Marcos Jr ha sweldo han MUP (military and other uniformed personnel) para dugang nga pabusugon an mga sundalo ngan pulis, samtang ginpapaantos an mga empleyado ha gubyerno, magturutdo ngan trabahador ha ospital ha himubo nga suhol, nadedelatar nga mga benepisyo ngan sobra-sobra nga pagpatrabaho.

20

nga dyip ngan van nga iligal nga gin-impound han LTO an nabawi han mga drayber hadton Disyembre 10; ini nga mga sarakyan gin-gamit ha protesta nga Baha ha Luneta 2.0 hadton Nobyembre 30.



KASAMANG
MADVI HIDMA

membro han Komite Sentral han Communist Party of India-Maoist ngan kumander han PLGA nga gindakop ngan tuyo nga ginpatay han pasista nga rehimen Modi hadton Nobyembre 18. Bantugan hiya ha magdinaugon nga mga taktikal nga opensiba ng PLGA.

Nakikigbisog an mga Pilipino para ha tawhanon nga katungod

Nakig-usa an mga Pilipino ha paghandum ha ika-77 nga Internasyunal nga Adlaw han Tawhanon nga Katungod hadton Disyembre 10. Ha magkalain-lain nga parte han nasud, yukut-yukot an nagmartsa agud ig-undong an tawhanon nga katungod ngan suknaon an rehimen Marcos ha waray wantas nga pagtalapas hini ha katungodhankatawhan.

Ginpangunahan han Karapatan ngan Bagong Alyansang Makabayan (Bayan) an mga paggios ha Manila ngan 15 nga syudad ngan prubinsya. Nagpahayag han suporta ha paggios an International Coalition for Human Rights in the Philippines.

Ha Manila, yukut-yukot an pinartisipar ha katitirok ngan programa ha Liwasang Bonifacio ngan ha martsa tipakadto ha Mendiola. Labot ha mga organisasyon nga nakabase ha National Capital Region, nakig-usa ha protesta an mga grupo nga tikang ha Southern Tagalog. Nagkakaurlusa nga panawagan nira: "Tapuson an pasista, korap, ngan pakuri nga rehimen US-Marcos Jr!"

Hadton Mayo 2025, pormal nga ginpatuman han rehimen Marcos an National Action Plan for Unity, Peace, and Development 2025-2028. Nagserbe ini nga balayan han ginpagrabe nga pampulitika nga panmuypoy ha katawhan. Prinsipal ini nga ginpapatuman han National Task Force-Elcac.

Ha lista han Karapatan, diri mamenos ha 11 kamilyon nga Pilipino an nagin biktima han pagtalapas ha tawhanon nga katungod han mga pwersa han estado ilarum han rehimen Marcos. Kaupod ha ira an mga biktima han ekstra-hudisyal nga pagpatay, pwersahay nga pagkawara, arbitraryo nga pagaresto, pwersahay o buwa nga pagpasunder, waray wantas nga panmusil ngan panmomba, pwersahay nga pagpaebakwet ngan pananarhug, pansamok ngan panhadlok, kalakip an Red-tagging.

Nagpapabilin nga nakapriso an diri mamenos ha 696 nga priso pulitikal, 163 ginaresto ilarum ni Marcos. Ha mga priso pulitikal, 136 an kababayin-an, 93 an lagas na, ngan 89 an masakit. Mayda liwat

nakapriso nga 12 nga konsultant ngan istap han National Democratic Front of the Philippines para ha negosasyon nga pankamurayawan.

Ha paghuhuman han protesta ha Mendiola, ginsunog han mga grupo an *effigy* nira Marcos ngan Sara Duterte nga ginladawan komo hadi ngan reyna han pasismo ngan korapsyon. Ginpakita han *effigy* nga may dara-dara nga armalayt hira Marcos ngan Duterte samtang nakalingkod ha mga maleta nga simbolo han korapsyon.

Kapareho nga mga protesta ngan aktibidad an ginlansar ha Baguio City, Tabuk City ha Kalinga, Mountain Province, Laoag City ha Ilocos Norte, Tarlac, Nueva Ecija, Bulacan, Legazpi City ha Albay, Naga City ha Camarines Sur, Iloilo City, Kalibo City ha Aklan, Roxas City ha Capiz, Bacolod City, Cebu City, ngan Davao City.

Pag-undong ha tawhanon nga katungod han singbahan ngan mga magbaralaud

Tikang pa ha panahon han hadto anay rehimen Duterte, pinakamadugo an rekord han estado ha pagtalapas ha tawhanon nga katungod ha Mindanao. Pinakagrabe ini han ig-imponer an balaud militar tikang Mayo 2017 tubtub 2019.

Hadton Disyembre 9-10, ginlansar ha Davao City an Mindanao Human Rights Summit. Gintambungan ini han 242 nga delegado tikang ha singbahan, sugad liwat han mga abugado, tagdependa han tawhanon nga katungod ngan organisasyon

masa han Mindanao.

Ha ikaduha nga adlaw han aktibidad, ginhimo an pankabug-usan nga assemblya ngan paglalansar ha Pakighiusa sa Anawim-Mindanao (Panaw-Mindanao). An bag-o nga tukod nga grupo usa nga organisasyon nga tuyo nga tagan hin tingog ngan hustisya an mga biktima han mga pagtalapas ha tawhanon nga katungod ha Mindanao.

Ha Kongreso, utro nga ginlansar an Mambabatas para sa Karapatang Pantao o Makatao Coalition hadton Disyembre 9. Katuyuanan han koalisyon nga igpasulong an mga balaud nga magdedepensa ha tawhanon nga katungod. Syahan ini nga ginbug-os han mga magbaralaud, kaupod an Makabayan Bloc, hadton 2018 agud tipahan an mga ekstra-hudisyal nga panmatay han hadto anay rehimen Duterte. Ginpapamunuan ini yana ni Rep. Leila de Lima.



Ikatulo nga anibersaryo han pagkamatay ni Ka Joma, ginhandum

Ginhandum han pamilya, kasangkayan, mga kasama, partido ngan organisasyon ha magkalain-lain nga parte han kalibutan an ikatulo nga anibersaryo han pagkamatay ni Kasamang Jose Maria Sison hadton Disyembre 16. Ha Pilipinas ngan the Netherlands, naglansar hin mga aktibidad komo paghinumdom kan Ka Joma.

Ha the Netherlands, ginpasalida an pelikula-dokumentaryo nga *My Friend the Terrorist* hadton Disyembre 13. Ginpangunahan an aktibidad han Jose Maria Sison Legacy Foundation, Friends of the Filipino People in Struggle ngan lokal nga organisasyon hini nga Maya Solidarity.

Ha Pilipinas, ginhalad kan Ka Joma han usa nga sanga han Partido Komunista ng Pilipinas ha Rizal an ginlansar hini nga pagaram ha Batakan nga Kurso han Partido hadton Disyembre 16.

Ha Quezon City, ginpasidunggan hi Ka Joma han mga tsapter han Artista at Manunulat ng Sambayanan ha ginpangunahan hini nga idlap nga rali ha University of the Philippines-Diliman hadton Disyembre 17. Ginhimo ini ha butnga han Lantern Parade, an tinuig nga parada han mga parol ha kampus nga ginkakadto han yukut-yukot nga magkurulaw.

Labot hini, ginpalandaw liwat ha rali an tiarabot nga ika-57 nga anibersaryo han Partido ha Disyembre 26 ngan an panawagan ha katawhan Pilipino, labina ha mga kabatan-unan, nga pumartisipar ha gerra han katawhan ngan umapi ha Bagong Hukbong Bayan.

AB

MSP-NCR, naglansar han asembleya

NAGTIROK AN MASOBRA 20 nga membro han tsapter han Makabayang Samahang Pangkalusugan-National Capital Region (MSP-NCR) ha usa nga sikreto nga lugar hadton Disyembre 6 agud iglansar an ira panrehiyon nga asembleya. Tinambong dinhi an mga trabahador pankalibsugan ha ospital, nars, doktor, *medical technologist*, dentista, ngan mga estudyante ha medisina ngan *nursing*.

Gintuman an asembleya han MSP-NCR ha paghandum ha ika-47 nga anibersaryo tikang han nahitukod ini hadton Disyembre 6, 1978.

Ha katitirok, ginpadig-on han MSP-NCR an panindugan para ha demokratiko nga rebolusyon han katawhan atubangan han sobra-sobra nga pag-inantos han katawhan Pilipino. Sering hini, importante nga itig-ob an kusog han sektor pankalibsugan ha pakigbisog han katawhan para ha pagpapasulong han rebolusyon.

Nabug-os liwat ha asembleya an 5-kapunto nga resolusyon para ha pagpapakusog han pakigbisog hini. Igin-gawas an resolusyon ha gin-gawas nga ispesyal nga isyu han mantalaan nga Ang Rebolusyonaryong Lunas.

Sigon ha tsapter, importante nga okasyon an katitirok para ha konsolidasyon han kaapihan han MSP. Naghatag-dalan ini para makapasaro an mga membro han rebolusyunaryo nga eksperyensya ha pag-oorganisa ngan eksperyensya ha paghahatag-serbisyo han MSP nga bumaton ha panawagan nga kumadto ha kabaryuhan. Dugang hini, importante nga pitad liwat an asembleya ha pangandam ha dugang pa nga konsolidasyon han MSP ha nasunyal nga lupgop.

Mga parag-uma ngan minoriya, ginpapalayas ha kalugaringon nga tuna

WARAY WANTAS AN panlulupot han mga langyaw nga kompaniya ngan dako nga kumprador burgesya ha natural nga karikuhan ngan anestral nga tuna han mga minoriya ngan parag-uma ha nasud. Gamit an pulis, militar ngan an mga korte, ginta-tamas-tamas hini an katungod han mga parag-uma ha tuna, ginpupuyoy an ira pag-ato ngan gin-gagamit an balaud agud palayason hira ha kalugaringon nira nga tuna.

Ha Sityo Marihangin, Barangay Bugsuk, Balabac, Palawan, ginkasuhan han "squatting" o iligal nga pag-ukoy han siyam nga manlulupot han tuna an 282 nga residente nga minoriya han sityo. Kaupod ha ginkasuhan mga patay na ngan mga bata. Hadton Disyembre 17, kinadto ha sityo an tawo han korte kaupod an mga armado nga pulis agud magsalawad han TRO o *temporary restraining order* kontra ha mga residente.

Sigon ha mando, diri poyde ulangan an pagsulod ha sityo han mga manlulupot han tuna ha sakob han 20 kaadlaw. Sigon ha mga residente, klaro nga mayda kalabutan ini nga kaso ha plano han San Miguel Corporation (SMC) nga luputon an ira anestral nga tuna. Pira katuig na nga ginpi-pirit han Bricktree Properties, subsidiaryo han SMC, nga angkunon an katunaan agud tinudgan han 25,000 kaektarya nga imprastraktura nga panturismo para ha grabeng mga rikuhanon ha Balabac.

Ha Dupax del Norte, Nueva Vizcaya, duha kabeses na nga ginmando han korte an pagbungkag han barikada han mga residente kontra ha Woggle Corporation. Hadton Disyembre 10, madinaugon nga napugngan han mga residente ngan tawo ha singbahan an gin-atentar nga pagbungkag. Utro nga sinulong an mga pulis hadton Disyembre 12 agud bungkagon an barikada han mga residente han Upper Tacbao, Barangay Bitnong. Pagbulos ini han kompaniya kahuman madiskubrehan nga sunog an *excavator* hini hiton nga adlaw.

Kabakyang an PNP Dupax Del Norte, ginhadlok, gin-gipit, ngan ginbastos hini an mga nagbarikada ngan ginruba an ira mga gamit. Duha nga babayi nga residente an gin-ulang han mga tawuhan ngan ginpi-pirit nga maghubo. Gintagaan liwat han pusil han mga pulis an mga residente han ig-insister nira an ira mga katungod. Ginkawat liwat an ira mga selpon ngan ID han nagatentar an mga residente nga igsadokumento an pandarahug ha ira han mga tawuhan.

Pankalibutan nga adlaw han mga migrante nga trabahador, ginhandum ha Pilipinas ngan ha iba nga nasud

GINHANDUM HAN magkalain-lain nga tsapter han Migrante an pankalibutan nga adlaw han mga migrante nga trabahador hadton Disyembre 18. Gindeklara liwat nira ini komo "Zero Remittance Day kontra ha korapsyon," usa nga adlaw nga duruyog nga diri magpa-padara hin kwarta an mga migrante ha Pilipinas. Porma ini han protesta han mga migrante nga trabahador agud igrehistro an ira pagkundenar ha hiluagan nga korapsyon ngan pagpapabaton ha ngatanan nga dabi.

Pinartisipar ha kampanya an mga tsapter han Migrante ha Thailand, Hong Kong, Japan, Canada, France, Italy, Australia, South Korea, Germany, Middle East ngan USA.

Naglansar liwat han protesta an pira nga tsapter han Migrante agud kundenaron an mga pangabuso ngan diskriminasyon nga nahiaaguman nira komo migrante nga trabahador.

Ha New Zealand, ginpanawagan han Migrante-Aotearoa an pagtapos ha sistema han paghihigot han *work visa* han migrante ha employer.

Ha US, nagprotesta an Tanggol Migrante Movement (TMM) ha konsulado han Pilipinas ha Chicago, California ngan Washington agud igpanawagan an pagpapalaya ha mga Pilipino nga imigrante nga gindetiner han Immigration and Customs Enforcement (ICE). Gin-anunsyo liwat an pagtukod han Families of Filipinos in Detention, organisasyon han mga kaurupdan, sangkay ngan han mga hadto anay gindetiner han ICE.

Ha Pilipinas, nagprotesta ha Mendiola an mga membro han Migrante Philippines tikang ha mga tsapter hini ha magkalain-lain nga prubinsya. Pinartisipar ha protesta an Concerned Seafarers of the Philippines, Samahan ng mga DH sa Gitnang Silangan, ngan Kilusang Mayo Uno.

Brutalidad han militar ngan pulis ha Masbate ngan Occidental Mindoro

HA MASBATE, nadakop, gintortyur antes tuyo nga ginpatay han 2nd IB an usa nga Pula nga mangaraway han Bagong Hukbong Bayan (BHB)-Masbate hadton Disyembre 13. An mangaraway nasamaran ha siki ngan nadakop kahuman an usa nga agway ha Barangay Pitogo, Cataingan hito nga adlaw. Ginpailarum hiya ha brutal nga pisikal nga tortyur tungod ha pagkamatay han duha nga sundalo han 2nd IB ha agway.

Samtang hadton Disyembre 9, gin-aresto han mga pulis ha kaso nga pagpatay ngan akusasyon nga hitaas nga upisyal han BHB hi Juanito Bultron. Residente hiya han Barangay Teresita, Cataingan nga mayda kapansanan sa panhunahuna. Ginpapagawas han pulis nga nadakop hiya ha Barangay Malibas, Palanas.

Ha Occidental Mindoro, ginsikmit ngan gintortyur han 76th IB hi Dolores Mariano Solangon, 47 anyos nga babaye nga Mangyan-Iraya, ha Abra de Ilog, Occidental Mindoro hadton Disyembre 2, ala-1:30 han kulop. Gin-gapos hiya ha usa nga kahoy ngan ginpailarum ha interrogasyon tubtub alas-4:00 han kulop.

Gindara hiya ha bubkiron nga erya ngan utro nga gintortyur tubtub alas-9:00 han gab-i. Ginpaukab liwat hiya para ha kalugaringon nga lubnganan ngan gintarhug nga papatayon kun maeskapo. Nahitabo an pagsikmit ngan pagtortyur kan Solangon kahuman han usa nga engkwentro han 76th IB ha BHB ha Sityo Balite, Barangay Lumangbayan ha Abra de Ilog hadton Nobyembre 26.

Aregluhay han pondo nga "pork" ha 2026 nga badyet, ginpinal ha bicam

AREGLUHAY HAN BAHINAY han *pork barrel* ha 2026 nga badyet an nabuksas ha katawhan ha ginhimo nga *bicameral conference committee* (bicam) han Senado ngan Uruubos nga Kapunungan. Bisan kun naka-livestream, waray mahitago han mga magbaralaud an ira aragway ha kun anu-ano nga porma han *pork barrel* ngan tagpira an masasalin ha badyet. Ginpinal han *bicam* an tadtad-ha-*pork barrel* nga badyet hadton Disyembre 18.

Kunuhay gin-ibanan han Senado an badyet han Department of Public Works and Highways hin ₱45 kabilyon tungod ha *overpricing* kundi ginbalik liwat ha *bicam* an masobra katunga han pondo. Ha sugad, nagpapabilin ha badyet an kadak-an han pondo nga "allocable" ngan "non-allocable" diin nakuha an presidente, mga kongresista ngan senador han kada tagsa nira nga kikbak.

Isa pa nga gin-areglo ha *bicam* an pagdugang han pondo para ha Medical Assistance for Indigent and Financially Incapacitated Patients, *pork barrel* han mga kongresista ha porma han "serbisyo nga pankalibugan." Ginpahitaas pa han *bicam* an alokasyon tikang ha orihinal nga ₱49.2 kabilyon ngadto ha ₱51.64 kabilyon, pondo nga kinahanglan unta gindugang ha badyet han mga pampubliko nga ospital.

Gin-aareglo liwat ha *bicam* an "LGU pork" o Local Government Support Fund nga haros gindoble han Senado tikang ha ₱20.2 kabilyon ngadto ha ₱38.1 kabilyon. Gin-ibanan han Senado an pondo para ha mga benepisyo ngan bonus han mga empleyado para padakuon an pondo nga ayuda nga katin han mga lokal nga upisyal.

Ini nga mga alokasyon dugang ha nahina na nga ginkasarabutan nga pondo nga katin han mga magbaralaud ha porma han ayuda. Ginpahitaas pa han *bicam* an ayuda nga Assistance to Individuals in Crisis Situations tikang ha orihinal nga ₱27 kabilyon ngadto ha ₱63 kabilyon.

Nagpapabilin liwat an *pork barrel* ni Marcos nga ₱243.4 kabilyon para ha *unprogrammed appropriation* (nga nahibantog nga gin-gamit ha mga maanomaliya nga *flood control project*) ngan ₱10.77 kabilyon nga *confidential and intelligence fund*. Bug-os liwat an ₱8-kabilyon nga *pork barrel* han pasista nga ahensya nga NTF-Elcac.

Destroso ngan kasamukan han imperyalista nga gerra, nahiaaguman han mga parupangisda ngan parag-uma

Ha mga parupangisda ngan parag-uma nga naukoy hirani ha mga base militar ngan ginlalansaran han mga *war games* han US, diri usa nga hirayo nga posibilidad an imperyalista nga gerra. Yana pa la, nahiaaguman na nira an kasamukan ngan destroso nga dara hini ha ira pakabuhi ngan komunidad.

Kalakip ini ha damo nga nahisa-dokumento han 35-katawo nga delegasyon tikang ha US nga linibot ha mga komunidad hirani ha mga base militar o EDCA *site* hadton Nobyembre. Ha sakob hin duha kasemana, burublag nira nga ginlibot an Cagayan Valley, Ilocos, Central Luzon, Cagayan de Oro, Marawi City ngan Cebu City. Kinadto liwat hira ha mga lugar diin agsub nga ginlalansar an hiluagan nga *war games* sugad han Balikatan.

Ginkadto han delegasyon an Pilipinas ha butnga han natikabuylo nga militarismo han rehimen Trump ha Asia. Ha naglabay nga duha katuig la, nag-istak an US hin mga *long-range missile* ha Pilipinas, nag-anunsyo hin pagtindog han mga pabrika han bala ngan *drone*, ngan nag-abre hin damo pa nga lokasyon para magin istakan, *outpost* ngan duongan han mga tawuhan ngan barko nga Amerikano. Naglansar hin waray hunong nga mga *war games*, naghimo hin mga *live-fire exercises* ha kadagatan ngan simulado nga mga kombat opensiba ngan depensiba.

Ha mga komunidad nga ginkadto han delegasyon, maaram an mga residente nga an mga base militar ngan *war games* nagbubutang ha ira ngan ha Pilipinas ha sentro han gerra nga imperyalista giutan han US ngan China. Gin-amin mismo han mga upisyal han US nga an mga EDCA *site* direkta nga nakasumpay ha "depensa han US ha Taiwan." Ginduso hini nga mga upisyal nga "igbaligya" han US an mga EDCA *site* ha Taiwan komo "non-weaponry support service" han nasud.

Tinuod nga destroso ha simulado nga gerra

"Kahuna namon gerra na," an agsub nga sering han mga residente nga nainterbyu han delegasyon ha mga baryo ha Cagayan Valley. Damo ha ira an natitigdaan nala ha tigda nga pag-abot han langyaw nga tropa, dagko nga sarakyan ngan mag-aringasa nga edro ha ira lugar kada mayda *war games* an US.

"Waray pahimatngon.

Waray nasering kun ano an mahitatabo, o kun ano kaiha," estor-ya han nainterbyu han delegasyon. Tigda nga napapahunong an ira pakabuhi agud tagan-dalan an mga "simulasyon" han pag-atake han tropa tikang ha kadagatan. Naabot an mga maniobra nga pankombat han tropa ha mga dalan, umhanan, pangisdaan ngan bakuran.

Baga hin nakapriso an mga residente ha kada taga nira nga mga balay samtang "narumpagas" an "simulado nga gerra" ha gawas han ira mga kabalayan. Waray ayuda para makalahutay hira ha matagadlaw. Waray kumpensasyon ha mga adlaw nga diri hira nakakapagpakabuhi. Kahuman han "gerra," nagbibilin pa an mga tropa hin basura nga basyo han bala ngan iba pa pa nga amunisyon ha mga baybayon, diin nag-uuyag an mga bata.

Peligro ha kadagatan

Direkta nga ginbubutang ha peligro han presensya han US ngan mga *war games* hini an mga parupangisda nga Pilipino. Hini la nga Disyembre, naglansar an US hin sagunson nga maritime cooperative activity (MCA) komo "power projection" (pagpara-



yaw) ha gin-aawayan nga mga isla ngan pormasyon ha South China Sea. An syahan (Disyembre 9-10) ginhimo ha weste han Zambales, hirani ha tradisyunal nga pangisdaan han Scarborough Shoal. Nagpalupad dinhi an US ngan magkalain-lain nga klase han *jetfighter* ngan nagparada han higan-te nga aircraft carrier nga USS Rafael Peralta.

Ginkunsidera han China an aktibidad komo probokasyon nga nagpahitaas han tensyon ha kadagatan. Nagresulta ini ha gitgitay giutan han mga pwersa nga Chinese ngan Pilipino hadton Disyembre 11-12, diin nahiamong an pira nga parupangisda nga Pilipino.

Gin-gamit han US an insidente agud tagan-rason an dagmit nga paglalansar han kasunod nga MCA (Disyembre 15-16). Ginpadara hini an USS Robert Smalls, usa nga *guided-missile cruiser*, agud paypayan an binuto nga gitgitay ngan pagawason nga "tagapagtalwas" hira han Pilipinas. Ini nga serye han mga insidente parte han mas hiluag nga padron han panunulsol han US, pagbulos nga baton han China ngan panhibang han pakabuhi ngan kaupayan han mga parupangisda nga Pilipino. AB

Diri mapeperdi an rebolusyunaryo nga kagiusan han India

W aray katupong an pasista nga atake han Operation Kagar han reaksyunaryo nga estado han India kontra ha masa ngan rebolusyunaryo nga kagiusan nga Indian ha naglabay nga haros duha katuig. Atubangan hini, nagpupursige an Communist Party of India (Maoist), an People's Liberation Guerrilla Army (PLGA), ngan bug-os nga rebolusyunaryo nga kagiusan han India nga pakyas-son an deklarado nga katuyuanan han Kagar nga tapuson ngan perdidhon an pag-ato han katawhan ha Marso 2026.

Tikang han igpatuman hadton Enero 2024 an Operation Kagar, mabayanihan ini nga gin-atuhan han PLGA. Ha luyo han ura-ura kadako nga pwersa nga pandumog ngan pag-ensirkulo han rehimen Modi, pag-ulpot han mga kampo militar ngan kampanya nga likidasyon ha pamunuan han Partido, nakapaglansar hin mga armado nga aksyon an gerilya nga hukbo.

Ha naglabay nga tuig, inabot ha 116 an napatay ngan 208 an nasamaran ha pwersa han pulis ngan sundalo ha mga armado nga aksyon han PLGA. Gintarget liwat hini an mga lunod-patay nga impormer han pulis ngan militar ngan mga tampalasan nga lider han Bharatiya Janata Party, naghahadi nga partido ha India. Prinsipal nga gumamit hin mga bomba an hukbo hini nga mga operasyon. Ngan ha pira nga higayon, gumamit an PLGA hin mga katutubo nga armas sugad han mga lit-ag nga suyak.

Sugadman, tangkod nga ginpahayag han CPI (Maoist) nga nahia-gum ini hin mga grabe nga kaperdihan ha naglabay nga tuig. Sering hini, bunga an mga kaperdihan han pansakob nga mga kaluyahan, kapakyasan nga igpatuman an mga plano han Komite Sentral ngan ginpagrabe nga atake han estado.


Tikang Disyembre 2024 tubtub Nobyembre yana nga tuig, inabot ha 320 nga mga rebolusyunaryo an namartir diin 117 kababayin-an. Diri mamenos ha 237 ha ira membro han Partido. Walo an aada ha lebel han Komite Sentral, kaupod an pankabug-usan nga sekretaryo han Partido nga hi Kasamang Basavaraju, 15 an aada ha lebel han komite han es-

tado, 25 an lebel han distrito, ngan 73 an lebel han komite ha erya. Mayda 13 tikang ha PLGA ngan 33 nga mga kadre ngan aktibista han organisasyon masa.

Agud makabawi han kusog, nanawagan an CPI (Maoist) nga papintason an pag-ato ha Operation Kagar ha bug-os nga nasud. Ginduduso han Partido nga tudlukon ngan igtul-id an nagin mga kasaypanan ha naglabay nga 22 kabulan para mapugngan an dugang pa nga mga kaperdihan. Kinahanglan liwat kuno adman ngan analisisaron an obhetibo nga kamutangan ngan suhetibo nga pwersa ha kada erya agud utro nga parayhakon an Partido, makonsolida an PLGA ngan an mga organisasyon masa.

Usa ha mga nahiuna nga natudlok han Partido nga kasaypanan hini, labina ha gerra han katawhan, amo an pagpapahaligot ha kalugaringon ha tikaguti nga erya nga nagigiusan. Sering hini, kinahanglan gumios ha mas higlapad nga lupgop an hukbo ngan diri magpabilin nga sentralisado. Partikular nga pananglitan hini an kapakyasan nga magbalhin han tropa han PLGA tikang ha rehiyon nga Dandakaranya, nga episentro han Operation Kagar, ngadto ha iba nga rehiyon.

Labot dinhi, ginpahayag liwat han Partido an panginahanglan nga ibuksas, igsalikway ngan makigsumpaki ha mga traydor ha rebolusyon. Pinakalanong hini nga mga traydor hira Sonu (Mallojula Venugopal Rao), hadto anay membro han Byuro ha Pulitika han CPI (Maoist),



ngan Satish (Takkallapalli Vasudeva Rao) nga aktibo na nga nagpapagamit yana ha rehimen Modi. Sinurender hira hadton Oktubre, ngan nag-aghat hin iba pa hadton Nobyembre. Inabot ha 299 nga indibidwal an nadanas han grupo ngan nagsurender han diri mamenos ha 277 nga armas han PLGA ngan Partido.

"Hini nga panahon, responsabilidad naton nga kumbatihon an kahadlok ngan kabaraka ha aton ranggo, magpakita han kaisog ngan pakusgon an kumpyansa han aton Partido," sigon ha CPI (Maoist). Dugang hini, ha kagrabihon han krisis ha nasud mas natikaklaro yana an panginahanglan nga pamunuan han Partido an pankabug-usan nga makaklase nga pakigbisog han masa nga Indian para ibagsak an paghahadi han mga imperyalista, dagko nga kumprador, ngan mga agaron maytuna.

Pagpapakita han determinasyon nga umabante han rebolusyunaryo nga kagiusan han India an pagelebrar hini ha ika-25 nga anibersaryo han PLGA hadton Disyembre 2. Ha Semana han Pagsalin-urog tikang Disyembre 2-8, ginlansar ha kaguguban, kapatagan, ngan sentro nga urban, an mga miting han grupo ngan gudti nga katitirok. Nagpaskin ngan nanhatag an mga rebolusyunaryo han mga poster ngan polyeto para igpanawagan an pagpapakusog ngan pag-api ha PLGA. Ginlansar ini hin may mahugot nga paghihirot ngan pagpaprayoridad ha seguridad tungod ha ginpagrabe nga atake han estado.

AB